

Հավելված N 1
ՀՀ կառավարության 2023 թվականի
հոկտեմբերի 26-ի N 1867 - Ն որոշման

ՆԵՐԴՐՈՒՄԱՅԻՆ ԾՐԱԳՐԵՐԻՆ, ԴՐԱՆՑ ՀԱՅԵՑԱԿԱՐԳԵՐԻՆ ԵՎ
ԱՌԵՎՏՐԱՅԻՆ ԸՆԿԵՐՈՒԹՅՈՒՆՆԵՐԻՆ ՆԵՐԿԱՅԱՑՎՈՂ ՊԱՀԱՆՋՆԵՐԸ,
ՆԵՐԴՐՈՒՄԱՅԻՆ ԾՐԱԳՐԵՐԻ ԳՆԱՀԱՏՄԱՆ ՉԱՓՈՐՈՇԻՉՆԵՐԸ,
ՄԵԹՈԴԱԲԱՆՈՒԹՅՈՒՆԸ ԵՎ ԿԱՐԳԸ

1. Սույն կարգում օգտագործվում են հետևյալ հիմնական հասկացությունները.
 - 1) ակտիվ՝ հետևյալ ոչ ընթացիկ ակտիվները՝ շենք, շինություն, սարքավորում, ենթակառուցվածք (էլեկտրահաղորդման և կապի գծեր, գազատարներ, ջրամատակարարման, ջրահեռացման, ջերմամատակարարման համակարգեր, օդային և ստորգետնյա մալուխային գծեր ու խողովակաշարեր, հենասյուներ և դրանց անվտանգ շահագործման հետ կապված շինություններ).
 - 2) ապրանքի տնտեսական բարդության ցուցիչ՝ ապրանքի բարդության՝ գիտատարության աստիճանը և միջազգային առևտրի կառուցվածքում հարաբերական մրցակցային առավելությունն արտահայտող՝ <https://atlas.cid.harvard.edu/> կայքում հրապարակված ցուցիչը՝ ըստ հասանելի վերջին տվյալների.
 - 3) առևտրային ընկերություն՝ Հայաստանի Հանրապետությունում գրանցված շահույթ ստանալու նպատակ հետապնդող կազմակերպություն (բացառությամբ տնտեսական ընկերակցությունների), որն իրականացնում է ներդրումային ծրագիր.
 - 4) գուտ ներկա արժեք՝ գնահատվող ներդրումային ծրագրի իրականացման ընթացքում դրամական միջոցների ներհոսքի և արտահոսքի ներկա արժեքների տարբերություն.
 - 5) կապիտալ ներդրում՝ Հայաստանի Հանրապետության տարածքում գտնվող ակտիվներում ներդրումային պայմանագրի ստորագրման օրվանից 48 ամսվա ընթացքում ներդրված գույք, եթե այդպիսի ակտիվների ստեղծումը,

ձեռքբերումը, կառուցմանը, վերակառուցումը, վերանորոգումը կամ արդիակա-
նացումն անհրաժեշտ է տնտեսապես բարդ ապրանքի արտադրության կամ դրա
ծավալների ընդլայնման համար.

6) մեկնարկի տարի՝ ծրագրի շրջանակներում շահառու ճանաչվելու տարի.

7) ներդրումային ծրագիր՝ շահույթ ստանալու նպատակով ժամանակի մեջ
սահմանափակված և որոշակի ռեսուրսներ պահանջող փոխկապակցված գործո-
ղությունների և միջոցառումների համախումբ, որն ուղղված է անշարժ կամ
շարժական գույքի կամ անշարժ և շարժական գույքի՝ միմյանց հետ փոխկա-
պակցված օբյեկտների համալիրի ստեղծմանը, ձեռքբերմանը, կառուցմանը, վերա-
կառուցմանը, վերանորոգմանը կամ արդիականացմանը կամ շահագործմանը.

8) մեկնարկի աջակցություն՝ ներդրումային ծրագրով նախատեսված կա-
պիտալ ներդրումների ավարտից հետո տնտեսապես բարդ ապրանքի արտա-
դրության փաստով պայմանավորված՝ տրամադրվող միանվագ աջակցություն.

9) միանվագ աջակցություն՝ եռամսյակի ընթացքում ներդրումային ծրագրով
նախատեսված կապիտալ ներդրումների 10%-ի չափով տնտեսապես բարդ
ապրանքների իրացման շրջանառություն ունենալու պարագայում.

10) հոսքի աջակցություն՝ արտադրության մեկնարկին հաջորդող տարի-
ների տրամադրվող տարեկան աջակցություն.

11) տնտեսապես բարդ ապրանք՝ մեկնարկի տարվա ցանկում ներառված
ապրանք, որի տնտեսական բարդության ցուցիչը հավասար է առնվազն 0.2-ի՝
բացառությամբ գյուղատնտեսական ապրանքների.

12) տնտեսավարող սուբյեկտ՝ ռեզիդենտ կամ ոչ ռեզիդենտ իրավաբա-
նական անձ, որը նախաձեռնում է ներդրումային ծրագիր:

2. Ծրագրի շրջանակներում աջակցություն է տրամադրվում այն առևտրա-
յին ընկերություններին, որոնք բավարարում են հետևյալ պահանջները.

1) առևտրային ընկերության նկատմամբ ծրագրի շրջանակներում աջակ-
ցություն ստանալու դիմումի ներկայացման օրվան նախորդող 365 օրերի ընթաց-
քում չկատարված հարկային պարտավորությունները գանձելու վերաբերյալ
վարչական վարույթ հարուցված չէ.

2) առևտրային ընկերությունը սնանկության վարույթում ներգրավված չէ որպես պարտապան, և վերջինիս նկատմամբ ներկայացված չէ սնանկության դիմում:

3. Ներդրումային ծրագրի հայեցակարգը պետք է պարունակի՝

1) տնտեսավարող սուբյեկտի և վերջինիս գործունեության հակիրճ նկարագրությունը.

2) ներդրումային ծրագրի նպատակը.

3) ներդրումների հակիրճ նկարագրությունը՝ ոլորտը, ուղղությունը, ֆինանսավորման աղբյուրները, ժամանակացույցը, հիմնական միջոցների և ընթացիկ ակտիվների խմբերը.

4) ներդրումային ծրագրի իրականացման վայրի նկարագրությունը, այդ թվում՝ ծրագրի իրականացման համար անհրաժեշտ հողամասերի կամ հիմնական միջոցների առկայությունը.

5) ձեռք բերվող կամ ստեղծվող հիմնական միջոցների վերաբերյալ տեղեկություն՝ ըստ տեսակների.

6) տեղեկություններ ապրանքների մասին, որոնք արտադրվելու և իրացվելու են ներդրումային ծրագրի շրջանակներում.

7) ներդրումային ծրագրի իրականացման ժամանակացույցը.

8) իրացման շուկայի, այդ թվում՝ արտաքին, հակիրճ բնութագիրը.

9) տարեկան իրացման կանխատեսումները՝ ըստ ապրանքատեսակների և շուկաների.

10) նոր ստեղծվող աշխատատեղերի վերաբերյալ տեղեկատվություն (քանակ և միջին աշխատավարձ).

11) ֆինանսավորման կառուցվածքը.

12) ծրագրի ֆինանսական մոդելը, որով ներկայացվում են ներդրումները (ոչ ընթացիկ և շրջանառու միջոցներում), իրացման շրջանառությունը, շահագործման և պահպանման, իրացման և վարչական ծախսերը, ներդրումների ֆինանսավորման աղբյուրները, մարման ժամանակացույցը և գուտ ներկա արժեքի հաշվարկը: Մոդելը մշակվում է այն նվազագույն ժամանակաշրջանի համար, որի

ավարտին ապահովվում է իրականացված ներդրումների հետզնումը և ներգրավված պարտքի մարումը:

4. Հայաստանի Հանրապետության էկոնոմիկայի նախարարությունը ներդրումային ծրագրի գնահատումն իրականացնում է տնտեսավարող սուբյեկտի՝ ծրագրի շահառու ճանաչվելու փուլում բավարար/ոչ բավարար սկզբունքով՝ հիմնվելով ներդրումային ծրագրի հայեցակարգում և դրան կից փաստաթղթերում առկա տվյալների վրա՝ ըստ հետևյալ չափորոշիչների.

1) ներդրումային ծրագրի իրականացման համար անհրաժեշտ ֆինանսական կարողությունների առկայություն.

2) ներդրումային ծրագրի ֆինանսական իրագործելիություն.

3) ներդրումային ծրագրում նախատեսվող կապիտալ ներդրումներ.

4) ներդրումային ծրագրի շրջանակներում արտադրվելիք և իրացվելիք ապրանքների տնտեսական բարդություն.

5) ներդրումային ծրագրի իրացման շուկայի կառուցվածք:

5. Գնահատումն իրականացվում է հետևյալ մեթոդաբանությամբ.

1) ներդրումային ծրագրի իրականացման համար անհրաժեշտ ֆինանսական կարողությունների առկայության չափորոշիչի գնահատումն իրականացվում է՝ հիմք ընդունելով ներդրումային ծրագրով առաջարկվող ֆինանսավորման կառուցվածքը և ֆինանսական միջոցների հասանելիությունը հիմնավորող փաստաթղթերը: Ներդրումային ծրագիրը ստանում է «ԲԱՎԱՐԱՐ» գնահատական, եթե ներկայացված փաստաթղթերով հիմնավորվում է անհրաժեշտ ներդրումների իրականացման համար ֆինանսական միջոցների հասանելիությունը.

2) ներդրումային ծրագրի ֆինանսական իրագործելիության չափորոշիչի գնահատումն իրականացվում է՝ հաշվի առնելով ծրագրում ներդրման հետզնումը ապահովելու կարողությունը: Ներդրումային ծրագիրը ստանում է «ԲԱՎԱՐԱՐ» գնահատական, եթե ներդրումային ծրագրի հիմքում դրված են իրատեսական ենթադրություններ, առկա է ռիսկերի համապարփակ վերլուծություն, և դրանք

կառավարելի են, ներդրումային ծրագրի ֆինանսական արդյունքները չափավոր զգայուն են հիմնական արտաքին գործոնների նկատմամբ.

3) ներդրումային ծրագրում նախատեսվող կապիտալ ներդրումներ չափորոշիչով ներդրումային ծրագիրը ստանում է «ԲԱՎԱՐԱՐ» գնահատական, եթե վերջինիս շրջանակներում կատարվելու է առնվազն 1 մլրդ ՀՀ դրամին համարժեք գումարի կապիտալ ներդրում, և առկա է բավարար հիմնավորում, որ այդ ներդրումներն ուղղված են լինելու տնտեսապես բարդ ապրանքների արտադրությանը.

4) ներդրումային ծրագրի շրջանակներում արտադրվելիք և իրացվելիք ապրանքների տնտեսական բարդության չափորոշիչի գնահատումն իրականացվում է՝ հաշվի առնելով առևտրային ընկերության ակնկալվող իրացման շրջանառությունում տնտեսապես բարդ ապրանքների իրացման շրջանառության մասնաբաժինը: Ներդրումային ծրագիրը ստանում է «ԲԱՎԱՐԱՐ» գնահատական, եթե ըստ ներդրումային ծրագրի հիմքում դրված իրատեսական ենթադրությունների՝ առևտրային ընկերության տարեկան իրացման շրջանառությունում տնտեսապես բարդ ապրանքների իրացման շրջանառության մասնաբաժինը առկա մասնաբաժնից (գործող արտադրության դեպքում) չի նվազելու և կազմելու է առնվազն 30%-ը: Իրացման շրջանառության հաշվարկում ներառվում են միայն տնտեսապես բարդ այն ապրանքները, որոնց ծագման երկիրը Հայաստանի Հանրապետությունն է.

5) ներդրումային ծրագրի իրացման շուկայի կառուցվածքի չափորոշիչով ներդրումային ծրագիրը ստանում է «ԲԱՎԱՐԱՐ» գնահատական, եթե ըստ վերջինիս հիմքում դրված իրատեսական ենթադրությունների՝ արտադրվող ապրանքների առնվազն 30%-ն իրացվելու է արտաքին շուկաներում:

6. Չափորոշիչներից որևէ մեկի գծով «ԱՆԲԱՎԱՐԱՐ» գնահատական ստանալու պարագայում ներդրումային ծրագրին տրվում է բացասական եզրակացություն, և վերջինս ենթակա է մերժման:

7. Ծրագրի շրջանակներում աջակցություն չեն ստանում այն առևտրային ընկերությունները, որոնք աջակցություն ստանալու դիմումի ներկայացման պահին

օգտվում են Հայաստանի Հանրապետության հարկային օրենսգրքի 127-րդ հոդվածով սահմանված հարկային արտոնությունից:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐԻ ՏԵՂԱԿԱԼ

Ա. ԽԱՉԱՏՐՅԱՆ